

Chés Darins

In les appelo chés mucheux. I z'habitotent chés muches, chés creutes, chés treus dins ch'cran. I z'avotent nin toudis vécu dins chés muches. Foque edpus qu'eul bompe al avo toute berzillé. Cha avo kminché par l'esplosion d'un "missile d'essai" mon chés Coréens. Pi chés méricains, pi chés chinois, pi chés russes, pi chés frinçais, pi chés anglais, pi chés eutes. Tertous ceutis qui z'avotent un-ne bompe, un canon, un fusil ou core un baton. Chés gins i z'avotent perdu l'sens commun ch'éto un-ne werre, un-ne werre partoute, chés werres ! In moins d'un-ne ennée, i n'avo pu grind kose edbout

Pi un-ne bompe un molé pu forte qu'el z'eutes al avo splosé. In n'o point iu l'timps d'cacher chti qui l'avo cainvolé. In tro jours i n'avo pu rien d'vivant dzur l'terre. Des monts d'cailleus, des férailles tortues. Pu d'arbres, pu d'herbe. Pu d'vaques, pu d'monieus. Pu d'mouques, pu rien.

Foque deux groupes ed gins i z'avotent survécu. Chés wagneus pi chés campernoules. Chés wagneus i z'avotent ahansé chés muches d'èche grind platieu, là-heut. Des grindes muches, d'où qui n'avo iu des boutèles ed vin. Achteure i n'avo mi pu rien, chés wagneus i z'avotent toute guerlafé. Chés wagneus i z'avotent pu foaire des prouvisions, pi i z'avotent foait avec sou qu'elle bompe al avo laissé. Dins des treu rimplis d'ieu, i z'avotent déteupé des puchons. Des récapés d'chés rivières d'in-heut. Des puchons i suffit d'nin prinde qu'un molé pi d'les laisser s'erproduire. Pi à m'zure in arrive à nourrir chés gins. D'un-ne douzaine au départ, chés wagneus i z'étoient chonquante achteure.

Ch'primier a s'avoir dit qu'in devo sortir pour d'aller vire si chés werres i z'étoient définies, ch'éto Karl, ch'fiu à Pierre, chti qui possédo chés quate muches d'chés wagneus. I n'avo bien chonquante ou soissainte ennées qu'in n'avo pu intindu des splosions, qu'in n'avo pu vu per chés huis d'chés creutes parsonne passer.

Dins chés terres, i n'feuso pu jamais grind nute, i n'feuso mi pu jour conme avant. Un-ne leumière faibe, un tiot jour. Karl i l'avo parti quat' es solé i l'avo lui un molé pu fort, cho arrive quat' i cange d'sens. Pi i l'éto erv'nu gramint d'timps pu tard. Probabe pu d'un-ne semaine, ou pétète deus, ou pétète pusse. Pierre, sin père, i n'voulo nin qu'i l'erparte, i voulo qui resse. Karl, li, i l'avo canger, i l'avo parlé avec chés honmes, l'ieu avo spliqué qu'il l'avo déteupé un-ne eute tribu. Un-ne tribu pu tiote qu'al pouvo leu fournir des campernoules. Qu'avec des puchons pi des campernoules, i n'erraint pu jamoais faim, pi qu'i s'raint pu fort. Pi qu'chés campernoules i z'avotent des feumes. Pi ...

Pi chés werres al z'ont r'kminché. Chés wagneus i z'ont prind des coutieus pi des bâtons pour d'aller taper chés campernoules pi leu prinde des campernoules, pi chés feumes.

Chés campernoules i z'étoient installés dins un-ne grinde muche, au fond d'chel vallée. Eul rivière al passo à l'intrée d'el muche. Cha favoriso l'culture d'campernoules. i n'a un-ne choquantaine d'ennées, quat chés campernoules i s'avotent réfugiés avec des prouvisions, chés campernoules i z'avotent poussé sans rien foaire. Quat' chés prouvisions el z'avotent té maquées, Louis pi ses gins i z'avottent mier chés campernoules. Des campernoules d'Péris,

des pluottes pi des mroules d'terre. Des mroules d'terre, cha r'san-ne à des mroules, des mroules d'avant chés werres. Dins chel muche, in n'in pousse eussi un campernoule un molé bleuse. Un maouais campernoule, chel mamananite. I n'feut point l'mier ! Sinon t'as du mo à t'panche pi ète défunctes. Chés campernouleus i z'ont foait aveuc. I z'ont ahansé leu muche, in foaisant des gardins à campernoules. en dégrattant l'terre à l'intrée d'el creutte pi en in foaisant des tiotes royettes d'où qu'in met des caveus d'campernoules. un caveu d'campernoule ch'est l'filament blanc qh'chés campernoules i zont pa d'sous eus. Pi à m'zure, chés campernouleus i s'sont espécialisés dins chel culture lo. Pi i z'ont invinté des ercettes d'cuisine d'campernoules. pi i z'ont agrindi l'tribu. Surtoute des files qu'al sont nées. Mier des campernoules ch'o doit foaire v'nir des files putot qu'des fious. Achteure chés campernouleus i sont trente, vinte et chonq files et feumes, foque chonq hommes. Deus vius et trois jones

Quat' chés campernouleus i z'ont vu arrifer chés wagneus, i n'es'sont mi déméfiés. Karl i l'avo passé chonq jours aveuc chés campernouleus. I l'avo meume foait des rl'èques à l'tiote Nardia. Charg, l'fiu à Louis, i l'avo meume busié qu'i r'viendro pour li vive aveuc l'tiote. Ch'o fero un honme ed pusse dins l'muche. Pi un honme qu'i vivo déhors, dins chés terres inconnues. Dins chés terres qu'in n'oso mi pu i aller. Keuse chés werres, keuse chés bompes, keuses chés splosions. Charg i s'in ramintuvo. I l'éto tiottain quat' Louis, sin père, i l'avo du s'mucher aveuc des gins dins l'creutte. I s'ramintuvo d'un-ne mason aveuc des z'arbres. Achteure pu d'arbres, pu rien déhors

Pu rien d'eute qu'èche Karl. Karl i l'o r'vnu. Li pi ses comarates.

Karl pi sin bâton, Karl pi ses comarates et pi leus bâtons et pi leus coutieus. Chés werres al n'ont nin r'kminchées. Charg i l'o préféré obéir à Karl. Karl et ses comarates i z'ont prind l'mitan d'chés campernoules pi i'eu in feudra d'zeutes. Karl et pi ses comarates i z'ont prind eussi chés feumes. Nardia pi tertoutes chés jones feumes. Pi i feudra core donner des campernoules quat' es solé i cange d'sens pour li luire, pi quat' i r'vient dins sin sens, pi core, pi core.

Cho foait gramint d'timps qu'Charg i l'ouvre pour chés wagneus aveuc chés campernouleus qui sont core lo. Quate honmes pi deus vièles feumes. Achteure qu'i sont miu nourris, chés wagneus i sont gramint pu forts. Leus feumes al font des fious. I sont au moins un cent. Karl i l'est ch' chef. I l'o deus coutieus à li et pi un bâton pu long qu'chti d'el z'eutes. Il'o drot à pusse d'puchon pi d'campernoules qu'el z'eutes. Quat'i vient vire chés campernouleus, i li feut un cadot, mi pu un-ne caïère. D'zur s'cahouète i l'o un rond d'fer aveuc des bleuses cailleus. Pi i c'minde à tertous.

Charg i li foait des courbettes à Karl, mais i li warde un kien d'es' kienne. I n'sait mi sou qu'cho veut dire "warder un kien d'es' kienne", mais i s'ramintuve qu'sin père i l'diso. I s'ramintuve chés longues dins ch'l'arbe aveuc un-ne planque, pi li qu'i l'est assis dzur l'planque, pi s'mère qu'al le pousse in cantant. S'mère. Manman. Toute i s'brouille pas d'avant ses yus. Comme ed d'ieu qu'al sort d'ses yus. Charg i l'ervoie sin père pi s'manman, i s'imbrachent. I s'ramintuve chés arbres, pi ch'l'herbe. Achteure toute i l'est gris. Ch'l'herbe al éto verte. Verde ch'est bieu. Quat' i freume ses yus, ch'est verte pi core bleuse comme i l'éto l'ciel.

Charg erbaie partir les honmes à Karl. I sont v'nus prinde des campernoules. Charg i ieu z'a foait del soupe d'campernoules en pusse. deus grinds cuviens. Karl i s'ro fin bënache. Tertous

chés wagneus i s'ront fin bënaches. I z'ont gramint ker l'soupe d'campernoules à Charg. I vont ête gramint bënache chés wagneus. Charg i l'o mis un molé d'mamanites dins l'soupe, meume un-ne boëgne louchie ! I vont foaire panchie avec l'soupe à Charg. Tertous i vont défuncter. Fini pour chés campernouleus d'ouvrer pour chés wagneus.

Finis pour chés campernouleus. Achteure Charg i sert l'soupe à chés campernouleus. D'taleur i n'erra mi pu rien dzur terre. Foque quèques puchons pi quèques campernoules.

Chés darins :

- Cainvoler : jeter, jeter au loin.
- Guerlafer : boire, boire sans soif.
- Déteuper : déterrer, mettre au jour.
- Campernoulev : myciculteur, fungiculteur (personne qui cultive les champignons).
- Plurote : pleurote.
- Mroule : morille, morchella (champignon ascomycète de la famille des morchellacés).
- Tiote royette : ruelle.
- Des rl'èques : des baisers.